



16. august 2012

UKA 2012/166

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqummiuppara:

Nunatsinni ilinniartitaanikkut angusat pitsaatsusaannik nalilersuisinnaasunillu, Ilinniartitaanikkut Pitsaassutsimik Angusanillu Naliliisartoqatigiit-nik pilersitsinnikkut pitsaaqutaasinnaasut aningaasartuutillu qanoq annertutiginnissaannik nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kaali Olsen, Inuit Ataqatigiit)

Tunngavilersuut

Nunatsinni ilinniartitaanerit pingasoqiusamik pingaarnertut unammilligassaqarput. Siullermik piumaffigineqartarput pitsaassutsikkut nunanut tamalaanut sanillersuussinnaasasut aappaatullu nunatsinni inuuiaqatigiinni pissutsinut pisariaqartitaasunullu imarisamikkut naleqquttuussasut kiisalu ilinniartut pisariaqartitaat naapertorlugit imarisamikkut ilinniartitseriaatsitigullu aqqissuunneqartassasut.

Nunatsinni ilinniartitaanerit imarisaannik, ilinniartitseriaatsinik, pitsaassusaannik il.il nalilersuisarneq sulii qaqutigoorpoq sulilu periaatsit uuttuutillu suut atorlugit nalilersuisarneq tamanna pisassanersoq sukumiisumik periusissiorneqarsimanani. Ilinniartitaanerit naalakkersuinikkut pingartinneqaqaat taamaattorli inuuiaqatigiit ilinniartitaanermut aningaasaliissutaat ilumut inuuiaqatigiinnut ilinniartunullu naammaginartumik tunniussisarnersut imaluunniit nunatsinni pisariaqartitanut naapertuuttumik aqqissorneqar-simanersut tunngavilersorluakkamik nalilersorneqartaratik.

Isumaliummi pingaarnertut siunertaavoq, inuuiaqatigiinni ilinniartitaanikkut pisariaqartitaasut tunngavigalugit ineriartortitsiuarnissaq qulakkeerniarlugu, nalileeriaatsinik nunatsinnut naapertuuttunik ineriartortitsiuarnissaq piviusunngortitsinissarlugu anguniarneqassasoq.

Ilinniartitaanikkut Pitsaassutsimik Angusanillu Naliliisartoqatigiit siullertut suliassaattut eqqarsaatigineqarput, ilinniarfiit ataasiakkaat peqatigalugit, nunatsinni ilinniartitaanermut nalilersuariaatsinik tunngavissiuussinissaq, pitsaassutsip qaffasissusiisa nalilerniartarneranut periusissatut uuttuutaasinnaasunik aalajangersaanissaq, ilinniartitseriaatsit jangersaanissat.

Ilinniartitaanikkut Pitsaassutimik Angusanillu Naliliisartoqatigiit pilersinneqareerunik suliassarilissavaat paasissutissat pissarsiaasut tunngavigalugit qaqugukkulluunniit ilinniartitaanerup nalilerneqarneranik Naalakkersuisunut nalunaarusiortarnissaq.

Pisortanut aningaasatigut allaffissornikkullu kingunerisassat

Naatsorsuutigineqarpoq nalunaarusiornissaq ingerlatsivinnit piuereersunit suliarneqarsinnaasasoq, allaffeqarfiit avataaniit ikiorserneqanngikkaluarluni.

Namminersorluni inuussutissarsiuteqarnermut aningaasatigut allaffissornik-kullu kingunerisassat. Kingunerisassaanik soqanngilaq.

Innuttaasunut aningaasatigut allaffissornikkullu kingunerisassat

Kingunerisassaanik soqanngilaq.